



SARAJEVO

SIPA uhapsila uposlenika
CBBiH Nedžada
Bajraktarevića

Centralna banka
BiH: Manjak
utvrđen prilikom
interne revizije
(Foto: I. Šebalj)

Ključar iz trezora ukrao 600.000 KM!

Guverner Kozarić suspendirao devet službenika dok istraga ne bude okončana • Osumnjičeni uzimao novac u apoenima od po 200 KM, u tri navrata u posljednje dvije godine

Državna agencija za istrage i zaštitu (SIPA) uhapsila je prekjučer uposlenika Centralne banke (CB) BiH Nedžada Bajraktarevića zbog pronevjere 600.000 maraka iz čve državne institucije. Tužilaštvo BiH jučer je saopćilo da vodi istragu zbog pronevjere u službi te je predložilo pritvor za Bajraktarevića.

Nalog Tužilaštva

Informacija o krađi iz glavnog državnog trezora jučer je odjeknula u bh. javnosti. Kako je rečeno iz Centralne banke, manjak novca uočen je tokom kontrole i odmah prijavljen poli-

ciji. Bajraktarević je bio ključar u trezoru.

On se sumnjiči da je ukrao novac u apoenima od 200 KM, i to u tri navrata, od 2012. do 2014. godine. Bajraktarević je odmah nakon prijave uhapšen po nalogu Tužilaštva BiH, koje zajedno s policijskim agencijama provodi detaljnu istragu kako bi bile otkrivene sve okolnosti vezane uz izvršenje ovog krivičnog djela.

Osumnjičena osoba predmeta je Tužilaštvu BiH uz izvještaj o počinjenom krivičnom djelu zbog postojanja osnovna sumnje da je počinila krivično djelo pronevjere u službi - navedeno je iz SIPA-e.

Saslušano 14 svjedoka

Državna agencija za istrage i zaštitu (SIPA) saslušala je u prethodna dva dana u svojstvu svjedoka 14 osoba radi istrage koja se odnosi na pronevjere novca

u Centralnoj banci, saznajemo iz izvora bliskih SIPA-i. Obavljen je i pretrjes na tri lokacije radi pronalaska dokaza koji će poslužiti u ovom predmetu.

Iz Centralne banke BiH saopćili su da je manjak novca uočen primjenom sistema interne kontrole, u trezoru Glavne jedinice Sarajeva.

Guverner Kozarić obavijestio je o tome istražne organe koji provode istragu, u okviru koje je identificiran - kažu iz ove institucije.

Mjere pritvora

Kozarić je odmah, kako je navedeno, suspendirao devet zaposlenika dok se istraga ne privede kraju.

U Tužilaštvu BiH kažu da

je Bajraktarević osumnjičen da je zloupotrebom položaja referenta za gotovinske transakcije u Odjeljenju za trezorske poslove (suključar) u Centralnoj banci i trezoru „počinio otuđenje 600.000 KM“.

Tužilac Tužilaštva BiH uputit će prijedlog za određivanje mjere pritvora u trajanju od 30 dana zbog opasnosti da bi boravkom na slobodi mogao ometati istragu, prikrivati dokaze te vršiti utjecaj na svjedoke ili saučesnike - rekli su iz Tužilaštva BiH.

M. AŠČIĆ

Barš nije nadležan

Zlatko Barš, direktor Agencije za bankarstvo FBiH, rekao je jučer da nije upoznat s pronevjerom novca iz Centralne banke, ustvrdivši da nije nadležan za kontrolu.

- No, novac koji je provjeren nije bio u emisijama. U ovom obimu koliko je uzeto, neće biti ugrožen bankarski sektor ni ti će narušiti stabilnost - rekao je Barš.



Barš: Nije upoznat